

PHILIPPI MARIAE RENAZZI

ADVOCATI ET ANTECESSORIS

ROMANI

DE

SORTILEGIO ET MAGIA

LIBER SINGULARIS.

*Haruspices Sagaeque, quæ utraque genera vana superstitione rudēs animos
ad flagitia compellunt, ne admiseris.*

Columella de re rust. Lib. I. Cap. VIII.



VENETIIS

ANNO MDCCLXXXII.

Excudebant Fratres Coletii.

W
3/17/13

MARKET

AD-OCATI ET ANTICESSORIS

ROMANI

ORTILLIO ET MAGIA

7440

R 386

A.272364

TE N E T I T

ANNO MDCCLXXII

TYPOGRAPHUS LECTORIS.

CUm nuper Libri hujus Exemplar Ms., quod in cuiusdam docti Viri manus forte pervenerat, mihi legendi exscribendique copia facta fuerit, statim consilium cœpi illud typis meis evulgandi, non solum Clarissimi Auctoris celebritate motus, sed etiam illeetus natura argumenti, cujus nova, brevis, dilucida ac solida tractatio ad improba Calliostri aliorumque huic similium Nebulonum detegenda præstigia, atque ad præjudicatas plurimorum hominum evellendas opiniones nostra hac etiam ætate quam maxime opportuna esse videtur. Id porro mea procul dubio Te monere, tua fortasse scire Lector intererat. Vale.

PRÆFATIO.

Est gravis illa sane, perdifficilis, ac periculi plena tractatio, quæ de Sortilegio & Magia suscipitur. Etenim haud ullæ ferme res sunt, circa quas tot tamque discrepantes in vulgus proditæ atque ad nostram usque ætatem propagatæ sint hominum opiniones, & de quibus Scriptores fusius quæni ævo disputaverint, vehementiusque dissenserint. Quod si quis consuluerit quæcumque de Sortilegio & Magia in utramque partem disceptata scripta- quæ sunt a viris non solum leviter eruditis, sed etiam gra- vissimis atque doctissimis: ille profecto ex longa molestaque novata opera aut nihil, aut parum adeo proficiet, ut iis jure ac merito cum Comico (1) objicere possit:

Fecistis probe,
Incertior sum multo, quam dudum.

Ac in tanta quidem discrepantia opinionum Scriptorumque dissensione, quid nobis de Sortilegio & Magia hoc singula- ri libro differere instituentibus reliquum esse videtur, quam ut quod ab aliis fuscè obscureque pertractatum est, id bre- viter atque dilucide exponamus, & nostro more nullius ad- dicti jurare in verba Magistri scopulos omnes solertissime declinemus, in quos incidere ut plurimum solent quicum- que

(1) Terent. Phorm. II. 4. v. 18.

que de hujusmodi argumentis sive loqui sive commentari
adgrediuntur. Quæ quidem omnia an bene felicitate præ-
stiterimus, æqui doctique Lectores, quibus diuturni nostri
maximique in criminali jurisprudentia expurganda, perpo-
lienda, atque enucleanda impensi labores, Studiosis fructuosi,
Reique publicæ non inutiles visi sunt, dijudicabunt.



LIBRI CONSPECTUS.

- Cap. I. **S**ortilegii etymon, atque definitio.
Cap. II. **S**quid Sors naturalis, quid divina, & quando
 hac uti fas sit?
Cap. III. *De Sorte dæmoniaca seu superstitiosa.*
Cap. IV. *Sequitur ejusdem argumenti tractatio.*
Cap. V. *Quibus variis nominibus designentur exercentes sor-*
 tilegas artes; & quam grave eorum sit facinus.
Cap. VI. *Pænæ recensentur sacris Canonibus Romanisque Le-*
 gibus adversus Sortilegos & Divinatores indictæ.
Cap. VII. *Quid sit Magia, & quid sub ejus nomine veniat.*
Cap. VIII. *Quibus argumentis constet de vi artium magica-*
 rum.
Cap. IX. *Exponuntur rationes illorum, qui nullam magicis*
 artibus vim inesse contendunt.
Cap. X. *Quemadmodum nonnullis visum diversas secumque*
 pugnantes de vi magicarum artium sententias
 conciliare, & quænam probabilior receptiorque
 illas componendi ratio esse perhibeatur?
Cap. XI. *Quænam soleant vulgo tribui Magiæ.*
Cap. XII. *Quid rerum Criminalium Scriptores de dæmonia-*
 cis fœderibus seu pactis tradant.
Cap. XIII. *Quæ circa Magiæ probationes Interpretum placitis*
 invecta, Forique usu olim essent recepta?
Cap. XIV. *De Pænis Canonico & Romano Jure præscriptis*
 adversus eos, qui de Magia accusantur.
Cap. XV. *Quid animadvertendum, quidve præstandum cir-*
 ca crimen pœnasque Magiæ.

D E
SORTILEGIO, ET MAGIA
LIBER SINGULARIS.

C A P U T I.

Sortilegii etymon, atque definitio.

Sortilegium, a quo nostra hac lucubratione differendi exordium nos ducere oportet, nomen est, quod a legendis sortibus venit. Ac Scriptores quidem rerum Criminalium eo sub nomine non solum divinationem, quæ per sortes fit, designarunt, ut illius nominis fert etymologia; sed etiam omne genus superstitionis, artiumque magicarum complexi sunt (1). Hinc Sortilegium sic late acceptum (2) in divinatorium distinxerunt, in amato-

(1) V. Urfay. *Lib. III. Inst. Crim. hoc tit.*

(2) Sortilegii nomine Plinius hoc quoque sensu usus est *Hist. Natural. lib. 28. cap. 4.* quod inscribitur, *De quibusdam Sortilegiis, & saliva hominis.*

☞ Quæ semper initio nostrorum omnium Operum, quæ typis edita a nobis sunt, Lectores monuimus; eadem hic quoque eos monitos volumus, scilicet

I. Auctorum, qui interdicti sunt, eas solum nos, ut quisque legendo cognoscere poterit, in usum nostrum derivare doctrinas, quæ nulla sunt infectæ labe pravitatis: cæteras Reli-

gio-

torium, & denique in maleficum seu veneficum. Divinatorium Sortilegium illud esse tradunt, quo quis futuras res vaticinari contendit: Quo autem Sortilegio foeminae, aliquando etiam mares in libidinosum amorem proclives fiunt; amatorium Sortilegium ab iis nuncupatur: Tandem juxta doctrinam eorundem Scriptorum illud est maleficum Sortilegium seu veneficum, quod ad mala quævis morbosque tam hominibus, quam brutis animantibus, atque inanimis etiam rebus inferendos comparatur (1).

At nobis longe opportunius accidit Sortilegii nomen in nativa sua significatione accipere, atque adhibere ad significandas futurarum occultarumque, five præsentium five præteritarum rerum explorationes, quæ per sortes fiunt, & quascumque alias superstitionas observationes. Vetustissimus porro est usus hujusmodi explorationum (2). Quem enim latet cupiditatem res aut cognoscendi futuras, aut ignotas sciendi adeo semper fixam hæsisse humanis pectoribus; ut quam non poterant suo ingenio homines illarum adsequi notitiam, hanc improbis vanisque artibus se acquirere posse contenderint. Primum inter eas locum obtinet Divinatio per sortes, de qua statim idcirco verba facienda sunt.

gioni, Sacerdotio, Imperio, bonis moribus adversas a nobis penitus improbari.

II. Libros vetitæ lectionis iis tantum a nobis citari, quibus legitima potestas inest eosdem legendi.

(1) V. Damohud. *Prax. Crim. cap. 61.*

(2) V. Grilland. *de Sortileg. Bud. de Arb. & Superst.*

C A P U T II.

*Quid Sors naturalis, quid divina; & quando
hac uti fas sit.*

Sors idem propemodum est, ut Tullii verbis utamur (1), quod micare; quod talos jacere, quod tesseras; quibus in rebus temeritas & casus, non ratio nec consilium valet: & ea quidem adhibetur vel ut pateat quid in dubia agendum quidve in ancipiti re vitandum, vel ut quid latens five præteritum five præsens aperiatur, quidve futurum sit innotescat. Hinc vulgo Sors dividitur in divisoriam, qua communium rerum partes æquantur, & munera inter pares ætate meritisque cives distribuuntur; in consultoriam, & in divinatoriam. Sed aptior Sortis in naturalem, divinam, & dæmoniacam seu superstitionem divisio esse videtur (2).

Quid sit Sors naturalis facile intelligitur. Nam ea nihil est aliud, quam arbitrarium fortuiti eventus in quacumque conductâ re experimentum. Profecto cum quid in ambiguis obscurisque rebus æquum sit homines, quorum acies ingenii angustiis admodum limitibus circumscribitur, agnoscere & constituere nequeant; ideo necessitas eosdem coegit, ut illarum diremptionem definitionemque sorti committerent. Quare naturalis Sortis usus non solum apud omnes fere gentes ad ambiguas contentiones definiendas, ad mu-

(1) Lib. II. de Divin.

(2) V. P. le Brun. *Hist. des Præf. Superst.* Liv. 2. ch. 3. n. 3.

munia laboresque distribuendos, ad æquandam in ludis, & contractibus mutuam lucri spem jacturæque formidinem, denique ad incertum quemlibet martem dirimendum moribus invaluit usurpari; verum etiam pluribus dubiis in rebus adhibendus Civilibus, Canonicis, ipsisque Divinis Legibus præscribitur (1). Sed de hac sortis specie, quam summus rerum omnium Arbiter DEUS moderatur, quæque, si superstitione & fraude careat, omnis criminosa labis expers est, hoc loco non quærimus (2).

Toties autem Sors dicenda erit divina, quoties per eam homines præteritarum vel præsentium rerum, quæ ignorantur, vel futurorum eventuum notitiam a Deo haurire contendunt; aut quid in ancipiti re eligendum faciendumque sit noscere præstolantur. Hac specie Sortis usi Gentiles, dum temere aperto Homeri aut Virgilii codice, qui versus primum in oculos incurrissent, eos in oraculi omen accipiebant. Quæ ratione narrat Spartianus (3) Imperium sibi prænuntiasse Hadrianum. Christiani quoque antiquitus

ex.

(1) Pleni sunt de usu hujusmodi sortium non solum apud antiquas, sed etiam recentiores Nationes Scriptorum libri, plenæ sæculorum memoriæ, plena exemplorum Vetustas. Consuli poterunt Homer. *Iliad.* VIII. Cæsar *De Bel. Gallic. Lib. 1.* Scriptores omnes *Hist. Rom. &c.* Hic solum referemus Virgilii versus, quibus describitur Dido construendæ Carthaginis munia suos inter Tyrios sorte tribuens *Æneid. Lib. 1. v. 511. 512.*

*Jura dædat, legesque viris, operumque laborem
Partibus æquabat justis, aut sorte traherat.*

(2) Num. cap. 33. Paralip. cap. 6. v. 34. Cod. Lib. 6. tit. 43. Leg. 3. Novel. 162. in fin.

(3) In vit. Hadr. VII.

exemplo sortium Virgilianarum sortes quasdam adhibuerunt, quas Sanctorum vel Apostolorum vocabant. Arreptis enim sacris utriusque Testamenti Libris ex sententia, quæ casu prior legenda se offerret, vaticinia captabant. Sed quoniam sæpe ejusmodi fortitionibus superstitio aliqua admiscebatur, eas idcirco adhibere pluribus veterum Synodorum Canonibus interdictum est. Quippe Sortis divinæ usus tunc solum usurpari potest, quando quis divino spiritu afflatur, ut DEUM consulat, quemadmodum aliquibus vitæ sanctimonia eximiis viris evenisse constat (1). Atque eo casu Sors non aliquid mali continet, ut scribit D. Augustinus (2), sed res est in dubitatione humana divinam indicans voluntatem. Secus verò divinæ Sortis usus culpa non vacabit; nec qui eum usurpaverit canonicam animadversionem effugiet (3). Ne fas enim est hominibus Dei voluntatem in rebus latentibus vel futuris perscrutari sortibus temere ductis, & præter necessitatem prodigia ab ipso audenter exposcere.

(1) Sic Abraham, Josue, Gedeon, Samuel, Saul, Eliseus reprehendi nequeunt, quod hujusmodi sorte aliquando usi sint. Divino quippe afflatu excitatos id peregrisse liquet ex sacris literis. Sic Apostoli temeritatis expertes fuerunt, cum cœlesti lumine illustrati sorte Matthiam in collegium suum cooptassent. Act. cap. 1. V. Can. 14. qu. 5.

(2) Can. 1. Caus. 26. Quæst. 2.

(3) Cap. 1. De Sortileg.

Postrema Sortis species dæmoniaca seu superstitiosa vocatur, quæ fit vel fieri vulgo creditur, quando aut Dæmonis interpellato auxilio atque opera accita improbæ præstigiæ, aut vana religione superstitiosæ observationes ad arcanas futurasque res exquirendas atque divinandas adhibentur. Nihil quondam celebrius, nihil veteres inter Pópulos vulgatus dæmoniaccis divinationibus, quas multiplici diversaque ratione proditas Historiarum monumentis perhibetur (1). Etenim narratur data aliquando petentibus dæmoniaca responsa ex imaginibus, id est emissæ voce ex Idolorum statuis, ut Delphis ex Simulacro Apollinis; quæ responsa dicebantur oracula, quasi in eis Deorum inesset oratio. Sæpe dæmoniaca oracula memorantur reddita per Vates, qui theurgicis expiationibus Pythium, fatidicum nempe Spiritum sortiti a Pythia Apollinis Sacerdote Divinatorum Principe Pythones & Pythonissæ quoque nuncupatæ sunt (2). Nemo ignorat quænam fides olim habita somniis, quæ præternaturali vi dormientium in mentibus excitata rebantur ad futuras res prænunciandas; atque sic habita exceptaque præfagia appellabantur vaticinationes per somnia, quorum interpretandi, & quæ even-

(1) V. De Cauz. de Cultib. magic. Lib. 1. cap. 5. §. 178.

(2) Wier. De præst. Dæm. Lib. II. cap. 14.

eventura essent ex iis eruendi causa mendax ars comparata Oneiromantia dicta est. Quid quod ex cranio hominis dæmoniacæ emissæ voces leguntur, quibus quæ eventura essent declararentur; idque veteres vaticinationem per cranium dixere. Quin immo & spectris seu vita jam functis hominibus in speciem inductis (1) dæmoniacas vaticinationes sciscitantibus redditas memoriæ proditum est (2). Tandem quæ forent agenda, quæque futura essent dæmoniacæ opera fuisse pandita atque prænuntiata signis figuris in terra, in aqua, in aere, in igne, in vitro, aliisque similibus rebus referuntur; unde natæ sunt superstitionis artes Geomantia, Hydromantia, Pyromantia (3), Catopromantia, quas omnes rerum criminalium Scriptores (4) inter species enumerant divinatorii Sortilegii. De Numa scriptum D. Augustinus reliquit,

B 2

qui

(1) Notissima est historia, quæ habetur 1. Reg. 28. de Samuele a Pythonissa instante Saule excitato. Quod quomodo evenit, & quemadmodum intelligendum sit, S. Scripturæ Interpretes inter se magnopere discrepant. Nam Origenes Comment. in cit. loc. censuit Samuelem reipsa Pythonissæ incantationibus fuisse e suis sedibus evocatum: Tertullianus, aliique plures Samuelis phantasma dæmoniacæ opera Regis oculis obversatum fuisse contendunt. Plerique vero censent Dei providentia atque imperio Samuelem stetitisse coram Saule; ut suam ei suorumque futuram cladem prænuntiaret: alii alias interpretationes prodiderunt, de quibus late doctèque agunt Calmet in dissert. de vis. Saul. & Natal. Alexand. Hist. vet. Test. dissert. 13. prop. un.

(2) Naud. Apol. Vir. de mag. susp. cap. 14.

(3) Ars divinandi per fulgura, de qua loquitur Cicero Lib. II. de Leg. & Lib. II. de Divin. spectasse videtur ad Pyromantiam, unde fulgurales Libri, quorum idem Auctor meminit. V. Cl. Creman. de Jur. Crim. lib. 1. par. 3. cap. 2. not. 1.

(4) V. Alph. Jur. Crim. lib. 2. tit. 1. cap. 1. de Sortileg. §. 55.

qui id fortasse ex vetere aliquo haurit Auctore, eum in aqua imagines Deorum seu Dæmonum ludificationes vidisse, a quibus audiebat quid in sacris constitui atque observari deberet (1).

Cæterum nemo unquam sapiens prudensque vir dæmoniacis divinationibus, quæ proditiæ narrantur, ullam habendam esse fidem existimavit (2). Nam Dæmones, siquidem ingenii acie hominibus longissime præstant, naturales rerum causas, earumque vim & effectus illis multo cumulatius absolutiusque cognoscunt: futuras vero res, quæ ex libero pendent hominum arbitrio, quarumque Deus ordinem ac eventum solus intuetur, ac suo nutu disponit, Dæmonas prorsus latere dubitandum non est (3). Hinc decepti quicumque dæmoniacæ opera futuras res se scire posse autumaverint. Ac re quidem vera si oracula ad trutinam revocentur, quæ superstitiosa Antiquitas tantopere coluit atque celebravit; ea ita ambigua sunt, ut ad Dialecticam debeant referri, vel flexiloga atque obscura, ut interpret egeat interprete, & fors ipsa ad sortem sit referenda. Quod si vaticina-

(1) *De Civit. Dei lib. 7. cap. 35.*

(2) Qui ingenii acumine, & sapientiæ laude inter veteres florere, ii probe suboleverunt humanas fraudes, commenta, dolos, qui ad credulum vulgus decipiendum ut plurimum oraculis inerant. Qua de causa Tullius *lib. 2. de Divinat.* illorum auctoritatem convellere, atque contemnere aperte professus est. Porro huiusmodi fraudes dolosque sedulo persequutus est, atque eleganter expressit cultissimus Fontenellius *Histo. des Oracles* quod opus caute tamen legendum. V. *Le Clerc, Bibl. Chois. Tom. XIII.*

(3) *S. Thom. 2. 2.*

nationibus aliquando rerum eventus responderunt ; partim id casu accidit , ut fit in omni oratione sæpissime ; partim permissu Dei contigit , ut homines suæ superstitionis , curiosæque improbitatis puniret.

C A P U T IV.

Sequitur ejusdem argumenti tractatio.

AUguria primum tenent locum inter superstitiosas observationes vana religione jampridem ad futuros præsignificandos eventus adhibitas, quas nunc operæ pretium erit recensere. Captabantur auguria, ut Cicero scribit (1), ex volatu avium, cantu oscinum, ex tripudiis sollemnibus. Succedunt Haruspicia, quo nomine veniebant divinationes erutæ ab hostiæ vel viventis vel mactatæ extis, atque ex flamma fumoque ignis, quo victimæ consumebantur. Haruspicia excipit omen, quod ex hominum vocibus ac sternutamentis educebatur. Plures tandem per superstitiosas observationes confictæ artes memorantur, quæ diversis nominibus distinguebantur. Quæ ex lineis manuum præfagia colligit ars, Chiromantia dicta est; quæ ex oris configuratione, Metoscopia; Notomantia, quæ ex dorsi figura (2): Astrologiæ autem nomine venit ea ars, qua ex vario astrorum adspectu, ut ajunt, atque influxu, quæ circa hominum, præsertim recens natorum, vitam, casus fortunamque eventura sint, conjici posse contenditur. Nam quæ motus Syderum con-

fide-

(1) Epist. Familiar. vi. 6.

(2) V. Thiers. *Trait. des Superst.* Tom. 1.

fiderat ac metitur insons, atque humanis usibus opportunissima ars, distinctionis ergo Astronomia solet appellari.

Longum est dicere quantum priscæ Gentes, ac veteres præsertim Romani (1) superstitiosas observationes coluerint, omnique generi fiderint divinationis; ut qui arduis præclarisque abs cœptis ne hostium metu nec facinorum difficultate abducerentur, eos vana quælibet puerilisque superstitio ac observatio a proposito dimoveret (2). Verum non defuere inter Quirites, qui præjudicatarum vulgi opinionum expertes omina atque auguria contemnerent, omnesque divinationes sapide irriderent. Julium Cæsarem religione a quoquam incepto numquam absteritum vel retardatum fuisse Suetonius memoriæ prodidit (3). Re enim vera quomodo ex iis quæ temere fiunt casuque eveniunt, futuræ res intelligi, ac prænunciari poterunt? Nam si falluntur, ut gravissime Tullius animadvertit

(1) Nihil mirum esse debet, si homines veræ Religionis lumine nondum illustrati, tam creduli, tamque superstitiosis artibus addicti fuerint. Sed postquam divini splendoris radii toto terrarum orbe diffusi Idololatriæ tenebras erroresque depulerunt, mirabuntur, credo equidem, seri sapientioresque nepotes superiori ætate tot inventos esse, & nonnullos adhuc inter nos reperiri, qui Astrologiæ fidant, divinationes ex superstitiosis eruant observationibus, auguria metuant, atque omina capiant. Quis vero non vehementer indignabitur nunc non deesse, qui auri sacra fame perciti somnia observant, atque ex iis divinationes educunt, millenisque student futilibus & superstitiosis artibus; ut parta ludi (Lotto, vocant) omnium incertissimi, & difficillimi victoria congerant divitias, quas in mare Sapiens ille demersit, ne ab eis mergeretur.

Heu hominum ignaræ mentes, heu pectora cæca!

(2) V. *Histoir. Critiq. des erreurs popul. Amsterd. 1733.*

(3) In vit. Cæsar. LIX.

tit (1), qui nihil sine probabili aliqua conjectura ac ratione dicunt; quid existimandum est de conjectura eorum, qui extis, aut avibus, aut ostentis, aut oraculis, aut somniis futura præsentunt? Hinc merito sapiens ille Cato apud eundem Tullium mirari se agebat, quod non rideret Haruspex Haruspice cum videret. Nullam vero sydera inter astrorumque motus & conversiones, ac futuros humanos eventus conjunctionem intercedere intelliget quicumque sibi conscius est, se quæ mavult agendi libertate pollere, probeque scit omnes rerum vicissitudines regere, humanaque inflectere pectora Illum, qui astra & sydera, cunctasque a se creatas res supercilio movet. Necesse est ergo fateri multa popularibus erroribus propagata, multa superstitione ad continendos in officio homines vana formidine religionis invecata esse; ut olim contigit Romæ (2), ubi Plebs a Patriciis hisce artibus, quarum isti notitiam sibi usumque peculiariter addixerant, ludificata jugiter fuit.

C A P U T V.

Quibus variis nominibus designentur exercentes sortilegas artes; & quam grave eorum sit facinus.

Qui Sortilegio dant operam, Sortilegi, vel Divinatores generatim appellantur. At quemadmodum singulæ Sortilegii species hætenus enumeratæ (Cap. III. & IV.) diversis inter se nominibus

(1) De Divinat. Lib. II.

(2) V. Heinec. Synt. Antiq. I. 3.

bus distinguuntur; ita etiam quicumque eas exercent peculiaria nomina acceperunt. Sortilegi quidem germana adhibita vocis significatione dicuntur, qui sortibus ductis futura audent credulis prænunciare; atque hoc pacto quæstum mentiendo faciunt (1): Augures vocati sunt, qui ex avium cantu ac volatu quid eventurum sit conjiciunt; Haruspices, qui exta hostiarum & fibras inspiciunt; Vates denique, qui se Deo plenos esse simulantes responsa dant. Ariolorum nomen, teste Turnebo (2), omnibus exta rimantibus, & per furorem vaticinantibus commune est: Somniorum conjectores sunt, qui somnia interpretantur; Astrologi, qui fata cujusque nosse profitentur, & natalitias syderum observationes edunt (3). Hi Jure Romano Mathematicorum quoque nomine designantur, quod præstantis ac utilissimæ disciplinæ nomine ad fallendum abuterentur (4). Sed quomodocumque hujusmodi sycophantæ appellentur, certum est eos omnes in sanctissimam, qua pure colendus est Deus, Christianam Religionem gravissime peccare.

Ac re quidem vera, ut opportune docet D. Thomas

(1) V. Matth. ad Lib. 48. ff. tit. 3. cap. 3.

(2) XIX. Advers. 20.

(3) Chaldaei vulgo nuncupabantur Astrologi omnes, Genethliaci, astrorumque Speculatores, ut liquet ex Leg. 5. Cod. de malefic. & mathemat. quia illorum disciplina tradita primum apud Chaldaeos, quæ gens Astrologiæ valde dedita fuit. Cic. 1. de Divinat. Hinc Chaldaus pro Astrologo dictus, ut Arabs pro latrone &c. V. Gothofred. in not. ad cit. Leg. "Vulgus, ut testatur Gellius Noct. Attic. lib. 1. cap. 9., quos gentilitio vocabulo Chaldaeos dicere oportet, Mathematicos dicit.",

(4) V. Gothofred. ad tit. 18. Cod. Lib. 9.

mas (1), multis modis Sortilegi peccant. Principio enim qui adhibitis Sortilegiis futuros eventus divina-
re contendunt, ii profecto frustra & irreverenter di-
vinæ providentiæ secreta pulsant, atque præscien-
tiam, qua solus pollet Deus, ad creatas humanasque
res transferre videntur; quod sine impio scelere fieri
vel excogitari non potest; præsertim si dæmoniacæ
sortes ad divinandum adhibitæ sint. Tunc siquidem
quæ singula sunt gravissima facinora Apostasia, Sacri-
legium, improba curiositas, iis omnibus sese Sorti-
legi obstringunt. Quid? quod non alii fortasse fre-
quentius, quam Sortilegi turbas in Republica ciere
solent, & communem tranquillitatem labefactare.
Nam, ut bene Tacitus observavit (2), qui sortile-
gas artes exercent, genus hominum est potentibus
infidum, sperantibus fallax, quorum responsis leves
animi ad novas spes facile impelluntur. Itaque tam
prohibitum est impias huiusmodi artes docere, quam
discere; tam exercere, quam exercentibus fidem præ-
stare ac adhærere (3); atque in quoscumque Sorti-
legii criminis reos severissimæ constitutæ sunt poenæ,
quas mox tandem enumerabimus.

(1) 2. 2. *Quæst.* 95. art. 1.

(2) *Annal.* Lib. II. Cap. 32.

(3) *Cod.* Lib. 9. tit. 18. *Leg.* 8.

*Pœna recensentur sacris Canonibus Romanisque Legibus
adversus Sortilegos, & Divinatores indicta.*

QUONDAM Jure Romano pœna capitali punitos; qui de salute Principis, vel summa Reipublicæ vaticinati essent, J. C. Paulus meminit (1); cæteros vero Divinatores inflicta prius fustium correctione civitate pulsos fuisse. Sed tandem Christianorum Imperatorum constitutionibus in Sortilegos omnes, Augures, Haruspices, Vates capitalis pœna indiscriminatim imposita habetur (2).

Jure autem Canonico Laici, qui sortilegas artes exercuerint, excommunicatione plectuntur; Clerici degradantur: & in excommunicationis quidem pœnam incurrunt qui nihil aliud egerint, quam Sortilegos Hariolosque consulere (3). Quod si a Clerico factum sit, detrudendus est in Monasterium ad perpetuam pœnitentiam agendam. Interpretes, rerumque criminalium Scriptores docent Sortilegium, quod hæresim, ut ajunt, manifestam contineat, pœnis coercendum esse, quæ manent hæresis crimen (4). De pœnis Astrologorum peculiare extant Constitutiones Romanorum Pontificum Xistii V. & Urbani VIII., quæ a memoratis Scriptoribus late exponuntur, & quibus cautum est de crimine Sortilegii posse Fidei

Quæ-

(1) *Sentent. V. tit. 21.*

(2) *Cod. lib. 9. tit. 18. Leg. 5.*

(3) *Cap. 1. & 2. de Sortil. V. Thesaur. de pœn. eccl. v. superst.*

(4) *V. Farinac. de hæres. quæst. 181.*

Quæsitores una cum Episcopis certatim judicia (1) exercere.

C A P U T VII.

Quid sit Magia, & quid sub ejus nomine veniat.

CÆterum Sortilegis ac Divinatoribus & affinitate & improbitate criminis ii pares, immo etiam superiores sunt qui Malefici Jure Romano nuncupantur (2), quosque Magos, si mares, si vero fœminæ, Lamias vel Striges vulgus appellat. Magi porro a Magia dicuntur, quam callere profitentur, & de qua tempus jam est, ut sermonem instituere adgrediamur. Magia persica vox est, quæ idem significat ac sapientiam atque doctrinam: unde ii quondam Magi vocabantur, quos primum Sapientes, postea modestiori nomine Græci & Romani Philosophos appellarunt (3).

C 2

Du-

(1) Sed utrum ad Judices solum Ecclesiasticos, an ad Laicos quoque pertineat cognitio Sortilegii, Doctores dissentiunt, ut observat Gagliard. *Instit. Canonic. Lib. 4. tit. 15. §. 44.* Quoniam vero hoc crimine & Religio læditur, & publica tranquillitas perturbatur, sic commode poterit omnis dissensio componi, ut Episcopi æque ac Magistratus Civiles de Sortilegio cognoscant; illi quidem ut Canonicis Censuris peccantes corripiant; hi autem, ut eisdem, tamquam publicis reis, corporeas poenas infligant. V. Caravit. *Instit. Criminal. lib. 1. §. 3. cap. 28. §. 28.* Van-Esp. *Jur. Eccles. part. 3. tit. 4. cap. 3.* Sed si res sit de ecclesiasticis personis, quæ hujusmodi facinoris insimulentur, illius cognitio Episcopis peculiariter reservata est Apostolicis Constitutionibus, quas refert Giral. *Exposit. Jur. Pontif. lib. 5. tit. 21.* quod & obtinet quando Sortilegium sit cum Hæresi, ut ajunt, conjunctum.

(2) *Cod. Lib. 9. tit. 18. Leg. 5.*

(3) V. Brucker. *Hist. crit. Phil.*

Duplex autem a Scriptoribus Magiæ genus distinguitur, naturalis altera, altera præternaturalis seu superstitiosa atque dæmoniaca. Illa circa naturam resque naturales, earum causas, occultasque vires cognoscendas, ignotas vulgo eruendas qualitates, atque edendos effectus cuicumque haud facile obvios versatur (1); quam omni ævo, & apud politiores Gentes summi coluere Viri, quorum solertia ac labore Physicæ, ut vocant Experimentalis, studium atque usus & inventus, & in communes hominum utilitates summo opere propagatus est (2). Magia autem præternaturalis, dæmoniaca, superstitiosa vanas maleficas impiasque artes complectitur, quibus nihil non mirum exitiale atque portentosum Dæmonum vi atque opera intercedente fieri non posse narratur. Atque colluvies Circulatorum & Sycophantarum, qui Magiam naturalem se excolere jactantes superstitiosam ac dæmonicam profitebantur, atque perniciosas nefariasque artes exercebant, in causa fuit, ut Magia generatim male in vulgus audiret, criminis nomen demum (3) evaderet.

Quid porro sub Magiæ crimine venire debeat non admodum constat inter Scriptores, qui de illo tractarunt.

(1) Apposite, si quis alius, Magiam naturalem descripsit Campanella *de sens. rer. sive de natur. Mag. Lib. VI. cap. 6.* scribens: *Quidquid Sapientes faciunt imitando naturam, aut ipsam adjuvando per artem non modo plebi ignotam, sed communitati hominum; id magicum opus haberi: unde prius quam ars vulgetur, semper dici Magiam; arte vero manifestata scientiam esse vulgarem.*

(2) *Boyl. de util. Philosoph. Experim. cap. II.*

(3) *Bohemer. Elem. Jur. Crim. Sect. 2. cap. 4. §. 36.*

runt. Nam ab aliis hoc crimen ad plures diversasque species porrigitur; alii species contrahunt, quæ sub eo comprehendendæ sunt: multi Sortilegium quod maleficum & amatorium vocatur cum Magia confundunt: contra vero quibusdam placet istam ab illo distinguere. Tandem plerisque Magia est crimen illorum, qui commercium, ut ajunt, cum Dæmone habent: quod commercium fere omnes rerum criminalium Scriptores vel expresso vel tacito pacto iniri docent (1). Expressum cum Dæmone pactum eos contraxisse tradunt (2), qui Deo religioneque ejurata se totos Dæmonis potestati subjiciunt eique obsequium pollicentur; ut ipso opitulante quæ velint, mira, ardua, iniqua perficere valeant. Pactum vero cum Dæmone tacitum memorati censent Scriptores ab illis initum esse,

(1) Si fides eisdem adhibeatur Scriptoribus, quorum antesignani extiterunt Tritthem. in *Antipal. Malef.* & Martin. Del Rio *Disquis. Magic.* expressum cum Dæmone pactum in conventu Magorum (Sabbathum vocant) solemniter stipulatur, infernisque initiato mysteriis character quidam imprimitur veluti tessera dæmoniacy foederis. Plura deinde hisce similia ipsi de hujusmodi pacto differentes comminiscuntur, quæ

Non sani esse hominis non sanus juret Orestes.

Enimvero non defuerunt, qui dæmoniaci ista foedera atque pacta negaverint. Eminent potissimum inter Italos nostros eruditissimus March. Maffei: *Arte Magica dileguata*: Jan. Rinald. Carl. *Epist. de Orig. Mag.* §. 39. inter Germanos Speus. *Cauth. Crim.* Thomas. *Dissert. de crim. Mag.* Bekker. aliique: inter Gallos D. d'André *Epist. Mag. Epist.* 2. Sed illa adstruere & contra impugnatores præ cæteris asserere adgressi sunt P. le Brun. *Hist. Critiq. des superst.* Tom. I. Liv. 2. chap. 1. Scheuchz *Phys. sacr.* tom. 4. pag. 318. Preat. *Mag. dimost. artic.* 4. & seq. Hieronym. Tartarot. *Congresso notturno delle Lamie*, Lettera al Carli, &c.

(2) Carpzov. *prax. Crim. part.* 1. quæst. 48. num. 11. Berlin. *part.* 4. concl. 3. Alph. a Castr. *de imp. Sortil. bær. cap.* 2.

esse, qui licet commercii cum Dæmone expertes; ea tamen Sortilegia patrant, quæ probe sciunt non natura sua, sed dæmoniaca opera vi aliqua pollere. Sed consultius commodiusque mihi egisse videntur qui (1) hæc omnia conjunctim complectentes ad Magiæ crimen retulerunt supersticiosas quascumque, improbas & maleficas artes, quibus Dæmonum, ut asserunt, intercedente auxilio atque opera accita nefarii homines utuntur ad inferendas ærumnas aut avertendas, ad præstigia, nefandasque res, & cujuscumque generis maleficia patranda.

C A P U T VIII.

Quibus argumentis constet de vi artium Magicarum.

AT vero Magiæ magicisque artibus eane Dæmonis opera & potestate tot tantasque miras, infuetae, perniciosas res efficiendi vis inest, qua artes illas pollere malefici cupiunt, & plerique hominum credunt? Id scilicet est, quod omni ævo doctissimorum virorum ingenia exercuit, & de quo nostra patrumque memoria gravissimi Scriptores ingenti doctrinæ adparatu, magnaque animorum contentione sedulo quæsierunt, & copiosissime disceptarunt (2). Quæ quidem disputatio ad Criminalem Jurisprudentiam potissimum pertinet. Ab illa enim disputatione quid de crimine Magiæ censendum, quidve statu-

(1) V. Alph. Jur. Crim. Lib. III. De Sortileg. §. 4. & seq.

(2) V. de Gauz. de Cult. Mag. Lib. I. cap. 4.

tuendum sit prorsus pendet. Quare antequam ulterius progrediamur, ea hic a nobis omnino attingenda est. Quod ita præstabimus, ut breviter primum gravioribus, quæ in utramque partem afferuntur, expositis argumentis, deinde enarrata ratione, quæ probabilior receptiorque esse perhibetur, discrepantes componendi opiniones; unusquisque quid debeat sentire, possit secum animo reputare.

Principio igitur qui Magiæ magicisque artibus summam dæmoniaca opera vim inesse asserunt, ii divinæ innituntur auctoritati sacrarum Litterarum. Ex his quippe constare inquit permisum Dæmonibus illudere hominibus, eosque prodigiis editis ad peccandum allicere (1). Cumque ingenii acie Dæmones excellant, multiplici scientia præditi sint, & dotibus polleant, quæ ut ajunt, Spirituum propriæ sunt; jam res possunt humanis impares viribus efficere, quæque homines intelligentia ac ratione comprehendere nequeunt: quo referuntur immissæ a Dæmone in Job virum justum repentinæ acerbissimæque calamitates, prodigia a Magis Pharaonis patrata, Samuel a Pythonissa instante Rege Saule excitatus, & Dæmon denique cui nomen Asmodæus, qui septem priores Saræ viros interemerat, ab Angelo Raphael in Desertum superioris Ægypti relegatus, ne insonti Tobia eidem nupturo noceret. Huc accedunt luculentissima testimonia, quæ innumeri fere diverso tempore diversisque locis

(1) Bodin. *Dæmonom.* Lib. II. Torreblan. *Lib. II.* Del Rio, *Disquisit. Magic.*

locis Magiæ Rei solemniter ediderunt (1), qui in Judicio fassi sunt dæmoniaca foedera iniisse, cum Dæmonibus habuisse commercium, eorumque opera ac vi miras se res gessisse (2), & maleficia patrasse. Quod si alicui fortasse non admodum hujusmodi testimoniis & confessionibus deferendum esse videatur; quis tamen, ut concludunt dæmoniæ magicarum artium vis assertores, tam audax erit, qui universarum Gentium consensui repugnare, omnium fere doctorum virorum opinionem contemnere, ipsam denique civilium sacrarumque Legum censuram reprehendere non vereatur? Constat enim apud homines vetustissimam fuisse (3) magicarum artium notitiam atque usum, inolitam ubique de præternaturali seu dæmoniaca illarum artium vi persuasionem, cognitum

(1) V. Remig. *Dæmonolatr. Lib. I.* Malleus *Malefic. Tom. II.* Michael *Pneumat.*

(2) Nemo miracula hic cum præstigiis confundat, quæ duo non semper sedulo distinxerunt nonnulli inter eos, qui Dæmonis magicarumque artium opera nihil non fieri posse contendunt. Miracula enim solus Deus edit, qui universas mundanas res finxit, suoque nutu moderatur. *Operatio miraculorum*, ut solide sapienterque docet D. Thom. *Quæst. Disp. q. 6. art. 5. est quoddam divinum testimonium indicativum divinæ virtutis & veritatis; quæ si Dæmonibus, quorum voluntas tota in malum est, daretur, Deus falsitatis eorum testis existeret; quod divinam non decet voluntatem.* Itaque plerique graviores Magiæ adsertores docent cum Lactantio *de ver. Sap. lib. 4. num. 5.* artem magicam moliri solum aliquid ad circumscribendos oculos valere. Nec aliter D. Augustinus miracula a Magis Pharaonis edita interpretatur *de Civ. Dei lib. 21. cap. 6.*

(3) Plin. *Hist. Nat. Lib. 30. cap. 1.* *Memoir. de l'Academ. roy. des Inscript. Tom. IV. & VI. Histoir. Critiq. des erreurs populaires. Amsterd. 1733.*

tum cultiores inter Populos Magiæ crimen, & severissimis poenis vetitum atque expiatum.

C A P U T IX.

Exponuntur rationes illorum, qui nullam Magicis artibus vim inesse contendunt.

AGe nunc eos audiamus, qui ut de priscis quibusdam Romanis refert Horatius (1), somnia, timores magicos, miracula, sagas, nocturnos lemures, portentaque thessala ridentes, ullam magicis artibus vim inesse plane inficiantur, & quorum non exigua semper extitit manus. Atque hi quidem, quos inter nonnulli spectatæ pietatis probatæque doctrinæ viri, compertum esse debere ajunt *Deum*, ut D. Paulus scribit, *non subjecisse Angelis orbem terræ futurum*; (2) ac propterea nulla vi magicas artes Dæmonum opera augeri ac pollere, illasque exercere ac profiteri flagitiosam certe rem esse, modo ad Blasphemiam, modo ad Superstitionis, modo ad Stellionatus, ac etiam Veneficii delicta pertinentem; sed quæ nequaquam Magiæ crimen tale præseferat, quale vulgo perhibetur. Ab illis autem asseritur congerronum improborumque hominum astu & nequitia, popelli credulitate, Philosophiæ naturalis ignorance, ac præjudicatis hominum opinionibus factum esse, ut fama præternaturalis seu dæmoniacæ magicarum artium vis excitata primum fuerit, & sensim latissi-

D

me

(1) Lib. II. Ep. 6.

(2) Epist. ad Hebr. II. 5.

me propagata (1). Nam quæ de Magis, magicisque artibus habentur in sacris Litteris, ea longe aliter ac interpretentur Magiæ adsertores, ab istius impugnantoribus explicantur, atque ut plurimum ad hariolos referuntur, præstigiatores, atque veneficos aliosque hujusmodi furfuris homines (2). Testimonia porro & confessiones illorum, qui de crimine Magiæ accusati se familiariter usos esse cum Dæmonibus, multaque & portentosa facinora dæmonjaco auxilio ac opera egisse in judicio fassi sunt; nihili censent esse facienda. Ea siquidem partim metu vique tormentorum, partim Judicum, qui reos interrogabant, dolo ac nequitia extorta sunt, partim denique tribui debent præjudicatis ipsorum reorum opinionibus & perturbatæ corruptæque phantasiæ, (3) qua decepti ea se egisse fatebantur, quæ facere quidem concupiverant, sed numquam reipsa patrauerant. Historiis autem constat iis in regionibus, ubi, quemadmodum in Lotharingia, bona illorum, qui tamquam Magiæ Rei dampnarentur, Fisco Dynastarum addicebantur; (4) frequentissimam superiori ævo fuisse hujus criminis accusationem, & longe numero plures, quam in tota fere reliqua Europa Lamias Magosque inventos & condemnatos esse. Cujus rei causam subodoratus fortasse, qui tunc apud finitimos Fœderatos Belgas
flo-

(1) Scot. *Detect. Art. Magic. Wier. de præst. Dæm.* Pierquin. *Ouvres Physiq. & geogr. Dissert.* 18.

(2) V. Bochar. *De anim. Sacr. Script. par. 2. lib. 3. cap. 5.*

(3) Speus *Cant. Crim. Dub. XX & seq.*

(4) V. Montagn. *Es. de Moral. Liv. 1.*

florebat Arnoldus Vinnius emunctæ naris Jurisconsultus, *Multa nimis*, scripsit, *temere credi, multa illis* (Magiæ accusatis) *vane affingi, multa falsa per tormenta illis exprimi, nec paucos per injuriam ignibus tradi mihi persuasum est* (1). Postremo quod pertinet ad communem Gentium consensum, & plerorumque Scriptorum persuasionem de præternaturali seu dæmoniaca magicarum artium vi contendunt qui hanc negant, utramque rem, si quid valet, valere solum, ut isto luculentissimo exemplo evidentius eluceat nullo non tempore homines etiam minime vulgares neque ignaros, non gravissimis erroribus obertos, præjudicatisque opinionibus irretitos fuisse. Itaque disputationem suam sic concludunt, ut eam Seneca jam concluderat scribens (2), *nihil horum quæ vulgo feruntur magicis artibus posse fieri tam certum esse, ut ea de causa nullius Philosophi schola intranda sit.*

C A P U T X.

Quemadmodum nonnullis visum diversas, secumque pugnantes de vi Magicarum artium sententias conciliare; & quamnam probabilior receptiorque illas componendi ratio esse perbibeatur?

QUamquam duæ illæ hucusque expositæ non vulgarium solum, sed etiam eruditorum hominum opiniones, quarum altera affirmat, al-

D 2

tera

(1) *Com. ad Inst. Lib. 4. tit. ult. §. item L. Cornel.*

(2) *Lib. 1. Natural. Quæst. cap. 7.*

tera vero negat præternaturalem dæmoniacamque vim magicis artibus inesse, sibi invicem omnino adversentur; tamen fuerunt nonnulli qui viam inire tentarint utrasque simul conciliandi, ac tantas demum componendi lites, quæ inter unius alteriusque sententiæ patronos jamdiu vehementissime fervent. Atque horum princeps & quasi dux laudatur Scipio Maphejus, vir editis pluribus variisque eruditis operibus notissimus in Litteraria Republica. Cum enim placuisset Maphejo (1) in scenam prodire adversus Hieronymum Tartarottum Academicum Roboretanum, qui vernaculo sermone librum evulgaverat ingenti plausu exceptum (2), quo in libro multæ quidem de Lamiis, nocturnoque earum conventu refutabantur præjudicatæ vulgi opiniones; sed luculentius atque elegantius, quam antea factum esset, præternaturalis dæmoniacaque magicarum artium vis adstruebatur; nactus illico est magni nominis adversarios, nec exiguis difficultatibus cœpit urgeri. Ut autem & ab his sese expediret, & illorum tela evaderet, alio se vertit, atque viam vel primus omnium, vel cæteris sane explicatius, ingeniosiusque inire ingressus est, qua, si fieri posset, discrepantes tuentium æque ac impugnantium præternaturalem dæmoniacamque artium magicarum vim sententiæ conciliarentur. Itaque novo scripto opere (3) tempora distinguenda esse censuit; & agnovit quidem præternaturalem dæmo-

mo-

(1) *Art. Magic. d'ileg. Veron.* 1750.

(2) *Del Congres. nott. delle Lamie. Rovered.* 1749.

(3) *Art. Magic. Annichil.*

moniacamque magicarum artium vim ante Christum natum; sed illam post ejus nativitatem, confectumque divinitus humanæ reparationis opus defuisse penitus multis fretus argumentis, nonnullisque librorum novi Testamenti veterumque Ecclesiæ Patrum locis ad hanc suam confirmandam opinionem adductis contendit. Qua distinctione, pace tanti viri dixerim, nec patronis nec adversariis præternaturalis dæmoniacæque magicarum artium vis satisfecit; quin immo sibi contradicere visus est, ut ei Tartarottus ipse verissime objecit. Ac ii quidem qui præternaturalem dæmoniacamque vim artium magicarum prorsus respuunt, haud passi sunt se a sua dimoveri sententia. Si enim, ut jampridem bene observarunt, visum est Maphejo sapientiæ bonitatisque Dei repugnare, ut Diabolum mortalibus sinat illudere; id ante æque ac post Christi Servatoris adventum repugnasset. Atqui primum illud non negat Maphejus; restat igitur ut alterum quoque inficiari nequaquam recte potuerit. Tum vero qui in altera erant sententia adstruente præternaturalem dæmoniacamque vim artium magicarum, ut in nova sua castra transfirent ab eis Maphejus impetrare non potuit. Scitissime siquidem regefferunt quibus librorum novi Testamenti locis ipse usus est ad singularem hanc suam constabiliendam doctrinam, ea latius patere, quam ipse vellè videatur. Idcirco enim illis in locis Dæmonum regnum eversum, eosque ligatos dici sentiendum, non quia deserint Dæmones illudere mortalibus; sed quod adversus novum regnum, Ecclesiam nempe, quam

quam Christus acquisivit sanguine suo, & in æternum duraturam constituit, ii prævalere nullo modo possint (1). Tandem & ipsa quorundam priscorum Ecclesiæ Patrum testimonia, quibus laudatus Auctor vel maxime innititur, constat non ita esse perspicua; ut secus ac ille pro sua illustranda opinione interpretatus est, soleant rectissime a communi Theologorum schola interpretari.

Verum enim vero omissa, quæ neutri parti arrisit, Mapheji opinione dicendum tandem quænam probabilior receptiorque ratio esse perhibeatur dissentientes feliciter componendi sententias, & veteres longasque doctorum hominum contentiones tollendi. Nemo autem hujusmodi rationem solidius concinniusque persequutus est viro doctissimo Thoma Maria Mamachio (2), cujus fere verbis, eadem ratio hic exponitur: scilicet artem esse ullam scientiamque magiæ qui putant, nã ii omnes maximo in errore versari videntur. Nam si qua esset ars magica, ea quidem certe triangulis quibusdam alteriusve generis figuris verbisque contineretur. Atqui nexus colligatioque triangulorum cum naturis vacantibus corpore non modo

(1) Non est diffitendum varias esse de iis librorum novi Testamenti locis Interpretum sententias, præsertim vero de loco Apocalypsi. Johan. cap. 20. At observatum est a Clariss. Mamachio *Orig. & Antiqu. Christi. Lib. III. cap. I. §. VIII. pag. 134. not. 1.* neminem Orthodoxorum ante hæc tempora fuisse, qui eundem Apocalypsis locum sic, ut Mapheius statuit, esse intelligendum arbitraretur. V. Calmet *in cit. cap. 20. Apoc. pag. 922. edit. Lucens.*

(2) *Orig. & Antiqu. Christi. Lib. III. Cap. I. §. VIII.*

do non esse ulla, sed ne comprehendi quidem cogitatione potest. Quotus autem quisque tam est ineptus, ut sibi persuadeat Dæmoni indefinite prorsus permisum vel suo arbitrio, vel cujusvis mulierculæ improbi que hominis rogatu accersituque ludificare atque vexare mortales? Sed evenisse interdum, ut superstitiosis impiisque quorundam Sycophantarum conatibus mali Dæmones faverint, & sic magicis artibus vis, quam natura sua non habent, dæmoniaca opera quandoque accesserit; id & sacrorum Bibliorum auctoritati conforme, & antiqua reverenda traditione confirmatum esse videtur. Quod autem quando contigit, & quidem perraro admodum, ut nemo prudens non ita inficias; factum est divino singulari permisso five ad exemplum, five ad poenam hominum, five aliis arcanis ex causis, quas nosse non licet, nec audacter fas est perscrutari.

C A P U T XI.

Quanam soleant vulgo tribui Magiæ.

Sed quomodocumque se res habeat, & five quis probabiliorē receptiorēque sequatur, cujus supra meminimus, five opportunam aliam idoneamque studeat comminisci rationem diversas atque discrepantes de præternaturali dæmoniacaque vi artium magicarum sententias conciliandi; id sane apud omnes constat, scilicet mira quæcumque & portentosa iis artibus fieri & canere Poetas, & Scriptores narrare, & credere vulgus, & Maleficos venditare. Proditum

tum in primis magicarum artium vi, pluribusque diversis adhibitis superstitionum speciebus morbos diuturnos atque gravissimos hominibus, ipsamque mortem, modo repente, modo sensim inferri. De Germanico quidem memoriæ prodidit Svetonius (1) eum devotionibus tentatum extinctumque fuisse. Tum quoque traditum magicæ operæ adscribendas esse fascinationes, quæ adspectu, oculorum obtutu, lingua ultra placitum laudante peragi dicuntur, & quæ sæpe legas vel audias maleficia conflari, ut somnus obrepat, possint inedia, dolor, tormenta tolerari, tacenda alto premi silentio, ut conjuges impediuntur ab usu conjugii, abortus sequatur, pueri rachitidis morbo adficiantur, hisque similia patrentur (2). Contra vero validissimas esse magicas artes ad maleficia quæcumque solvenda, expellendos morbos, sanitatemque recuperandam (3) Leges ipsæ Romanæ aperte

te

(1) In *Caj. Calig. Cap. I.*

(2) V. *Apul. Metamorph. Damohud. Praxi crim. cap. 6. Del Rio Lib. 2. q. 6.*

(3) Apud veteres quoque Christianos sensim irrepserat usus hujusmodi superstitionis remedia adhibendi non tam pietatis contemptu, quam fascinatione vulgari errorum. Ac res tandem eo usque processerat, ut D. Joan. Chrysostr. *Homil. 8. ad cap. 3. Epist. ad Coloss.* aliquatenus martyrio æquaverit "si puer ægrotus amuleta non fecerit." Sed ea semper improbavit Ecclesia, & impositis pœnitentiis animadvertit in illos, qui hujusmodi phylacteria adhiberent. V. *Can. 36. Synod. Laodic. Can. 61. Syn. Sextæ in Trul. Tom. 1. & 3. collect. Concil. Harduin.* Utinam nec nostra quoque ætate invenirentur, qui superstitionis remediis fidem adhibere non erubescunt! Cum nonnullis ab hinc annis a lethali morbo vix emersus in tertianas febres inci-

te innuere videntur, quibus cavetur, nullis criminationibus eos implicandos esse, qui magicis artibus remedia agris corporibus quaesierint (1). Multa certe ac mirabilia vulgo narrantur de amuletis, quo nomine veniunt remedia magica, ut numismata, ceræ imagines, carmina, potiones narcoticæ, arcana & inusitata verba, quæ ad arcendos morbos & impendentia mala amolienda adhibentur. Et quamvis hæc omnia commenta hominum, ut scribit Frommannus (2), esse videantur rationi & experientia adversantia, tamen quemadmodum Marcellinus testatur, quondam medicina admisit auctoritas (3).

Amorem præterea, qui forma solum & moribus conciliatur, philtis magicisque poculis atque carminibus excitari; diuque ali fama est. Verum

Phasias Æsonidem, Circe tenuisset Ulysses,

Si modo servari carmine posset amor,

ut cecinit artis amandi Magister (4), a quo discent spem omnem abjicere eos debere, qui ut vivat amor ad Æmonias artes recurrunt. Narratur quoque præparatis magico artificio poculis pudicos animos ad libidinem sæpe percitos; & contra aliquando veteres

E

ex-

cidissem, non defuit qui mihi homini philosopho, nec simul ignaro quid liceat Christiano, nescio quod phylacterium omni ope enixus est propinare ad repellendam reversionem febrium, quæ adventante vere mutatoque cælo sua sponte tandem evanuerunt.

(1) Cod. Theodos. lib. 9. tit. 18. Leg. 3.

(2) De fascin. Lib. 1. par. 2. sect. 2. cap. 19.

(3) Lib. VI. cap. 18.

(4) Ovid. De art. am.

extinctos amores , & in acre odium extemplo conversos. Veteres autem ita fuere persuasi magicis artibus fruges posse in alienum agrum exportari , imbres , ventos tempestatesque attrahi atque repelli (1), ut Decemviri Romæ Legibus XII. Tabularum poenas præscripserint adversus excantantes alienas fruges (2); & Imperator Constantinus M. crimine nequaquam teneri eos declaraverit (3) , qui magicis artibus fruges conservarent , & grandinem tempestatemque a fati averterent.

C A P U T XII.

*Quid rerum Criminalium Scriptores de dæmoniacis
fœderibus seu pactis tradant?*

Nemo mirabitur tot tantaque portenta , quot superiori Capite retulimus , edi a Magis Lamiisque , nisi qui numquam legerit vel audiverit illos fœdus cum Dæmonibus inire , iisque , ut fit inter amicos , familiariter uti; aut si legit vel audivit , fidem auditis lectisque habere noluerit. Ac multa quidem de illis vulgo feruntur , & a Scriptoribus narrantur , quæ summam profecto cuique admirationem

mo-

(1) V. Quintilian. *Declam.* XIV.

(2) Doctissimus Antonius Matthæus *ad tit. II. lib. 47. Dig. num. 5.* " *Verosimile baud esse scribit Decemviros de alienis frugibus excantatis legem proposituros fuisse , nisi comperissent id revera contigisse* „ . Quanto sagacius Senec. *Quæst. Natural. Lib. 4. cap. 7.* " *Apud nos , inquit , in XII. Tabulis cavetur , ne quis alienas fruges excantasset . Rudis adhuc Antiquitas credebatur , & attrahi imbres cantibus posse , & repelli* „ .

(3) *Cod. Lib. 9. tit. 18. Leg. 4.*

movere debent. Nam credit vulgus, afferunt Scriptores (1), Magos Lamiasque amatorios cum Dæmonibus ludere lusus, eorumque impudicis amplexibus delectari, & concubitu frui: tum vero utroque transmutari in hircos, volitare per aera (2), statis noctibus ad inferna celebranda mysteria simul convenire, aliaque his similia patrare (3). Nihil Mas-sylæ Sacerdoti magicarum artium vi factu non possi-

E 2

bile

(1) Godelm. *De Mag. Lib. 1.* Bodin. *De Dæmonom. Lib. II.* Libau. *Strigiport. Amoen. De delict. & pœn. tit. 8. §. 6.*

(2) Lucii Apuleji Philosophi Platonici vitam, fata atque scripta nemo vel leviter eruditus ignorat. Is *XI. editis Metamorphoseon libris*, quidquid Magos Lamiasque moliri & facere, quidquid theurgicis artibus peragi posse superstitiosa & credula Antiquitas rebatur, nova elegantique ratione expressit atque delineavit. Sed longe alius ipsi scopus, quam recentioribus Dæmonographis Scriptoribus, quorum agmen ducit notissimus Martinus del Rio. Nam isti quæ collegerunt retuleruntque, ea credidisse videntur, aliisque bona fide credenda propinasse. At Apulejo mens fuit popularium errorum satyram scribere, & magica portenta sic narrare, ut,

Si foret in terris, rideret Democritus.

Nec defuit nostra ætate, qui Apulejum provido consilio imitaretur, nempe Auctor gallici libri inscripti *Histoire des imaginations de Mr. Ouse*, quem nos iis legendum commendamus, qui anilibus narratiunculis præjudicatisque circa hujusmodi res vulgi opinionibus a pueris imbuti sunt.

(3) Temperare mihi non possum, quin inter innumera fere quæ legi Magis Lamiasque tributa portenta speciminis loco unum hoc exemplum subiciam. Tritthem. in *Quæst. 3. ad Maxim.* scribit, *satis sibi constare quamolures sagas verbis & herbis fortissimas quasdam aperuisse seras.* Est hoc vetus Goetarum commentum, scilicet æthiopidis herbæ tactu clausa aperiri omnia: quod referens Plinius *Hist. Natural. Lib. 36. cap. 4.* opportunissime animadvertit: *Non satius fuit Æmilianum Scipionem Carthaginis portas herba patefacere, quam machinis claustra per tot annos quaterere.*

bile Annæ sorori Dido referebat apud Virgilium (1):

Hæc se carminibus promittit solvere mentes

Quas velit: ast aliis duras immittere curas;

Sistere aquam fluviiis, & vertere sydera retro;

Nocturnosque ciet Manes: mugire videbis

Sub pedibus terram, & descendere montibus ornos.

Sed ut non defuerunt qui nulla magicas artes vi pol-
lere contenderent, quemadmodum paullo supra (Cap.
IX.) narravimus; sic multi etiam quæcumque vulgo
de Magis & Lamiis tradita scriptaque habentur im-
pugnare adgressi sunt. Atque hi magno argumentor-
um adparatu, ingentique rationum pondere instructi
Strigiportium, Sabbatha, transmutationes, cæteraque
his similia fieri nequaquam posse, nec aliter quam
risu a prudentibus doctisque viris excipienda esse de-
monstrarunt (2). Quin immo nonnulli inter eos ve-
riti non sunt ipsa dæmoniaca fœdera atque pacta,
quæ tantopere celebrantur, & quibus rerum crimi-
nialium Scriptores docent Magiæ crimen constare, in-
ter vulgares errores technasque referre (3). Ac quod
spectat ad Magiam & magicas artes dæmoniacumque
commercium sic se rem habere ab eisdem asseritur,
ut Seneca jam suo tempore se habuisse innuit. *Qui-*
dam enim, quemadmodum scripsit (4), *incredibilium*
relatu commendationem parant, & lectorem aliud ætu-
rum si per quotidiana duceretur, miraculo excitant.

Qui-

(1) Æneid. Lib. 4. v. 487. & seq.

(2) V. Tartarot. Congres. Nottur. delle Lam. Lib. 3. cap. 14.

(3) V. Carl. Epist. ad Tartarot. de orig. Mag.

(4) Lib. VIII. Cap. 6. Quæst. Natural.

Caput XII.

37

Quidam creduli, quidam negligentes sunt; quibusdam mendacium obrepat, quibusdam placet; illi non evitant, bi appetunt.

C A P U T XIII.

Quæ circa Magiæ probationes Interpretum placitis inventa, Forique usu olim essent recepta.

TEmpus jam est attingendi quæ spectant probationes Magiæ, formamque olim in Foro receptam procedendi adversus illos, qui de ea accusarentur. Ac crimen quidem tantam habens obscuritatem, totque difficultatibus obnoxium quibuscumque ne iudiciis atque argumentis probari posse existimabitur? An sine ullo personarum delectu Testibus omnibus, etsi indoctis, rudibus, præjudicatisque vulgi opinionibus imbutis indiscriminatim fidendum erit? An denique confessioni omnino standum ipsius Accusati, de quo semper dubitari jure ac merito potest eum vel deceptum esse vel decipientem? Ita sane docuerunt omnes pene rerum criminalium Scriptores (1), quo tempore nemo fere suspicabatur Magiæ accusatione ignaros prorsus atque innocentes opprimi facile posse atque circumveniri. Vetus profecto hoc fuit generi humano malum, ut scilicet non solum deformes vetulæ senesque morosi, quos egestas & tristis foedusque corporis cultus male commendaret, populi rumoribus pro maleficis haberentur; sed etiam viri sagaces, industrii & non vulgari doctrina præditi, qui

ab

(1) Cарпов, *Prax. Cr. P.* 3. q. 49. Remig. *Dæmonol. Sag.*

ab omni meteficiorum labe erant immunes, in Magiæ suspicionem venirent (1). Quod olim C. Furio Cresino evenisse meminit Plinius (2); & de se ipso Lucius Apulejus testatur, qui singulari ingenii vi animique constantia objectum sibi crimen repulit, & periculum damnationis evasit.

Quid? quod multa alia sunt de Magia, tamquam de crimine excepto a rerum criminalium Scriptoribus tradita atque adnotata, quæ partim ridicula, partim sævitæ plena, partim denique a recto æquitatis jurisque tramite devia vehementer merent improbari. Itaque audiendi non sunt docentes inquisitionem institui in quemlibet posse deficientibus necessariis indiciis (3), fas esse suggestivis interrogationibus accusatum ad confitendum objectum crimen adducere; Reum extrajudiciali sive sua sive socii criminis confessione abunde convinci, nullam illi se defendendi copiam esse faciendam; quæ quidem omnia quan-

(1) V. Gabr. Naud. *Apol. Vir. Illustr. de Mag. susp.*

(2) Quomodo se res habuerit ab ipso Plinio præstat audire. C. Furius Cresinus, sic ille narrat *Hist. Natural. Lib. XVIII. cap. 6.*, e servitute liberatus cum in parvo admodum agello maiores multo fructus perciperet, quam ex amplissimis vicinitas; in invidia erat, ceu fruges alienas pelliceret veneficiis. Quamobrem a Spurio Albino Curuli die dicta metuens damnationem, quum in suffragium Tribus oporteret ire, instrumentum rusticum omne in forum attulit, atque adduxit filiam validam, & ut ait Pisonem bene curatam ac vestitam, ferramenta egregie facta, graves ligones, vomeres ponderosos, boves saturos; postea dixit: Veneficia mea, Quirites, hæc sunt; possum vobis ostendere aut in forum adducere lucubrationes, vigilias & sudores. Omnium sententiis absolutus itaque est.

(3) V. Bohemer. *Elem. Jur. Crim. sect. 2. cap. 4. §. 69.*

quantopere abhorreant ab juris æquitatisque tramite rectaque ratione Criminalia instituendi Judicia, & unusquisque suo ingenio facile percipit & uberrime colligi potest ex Libro tertio nostri majoris Operis (1), Romæ primum editi, aliisque in urbibus pluries deinde recusi, quo universi Criminalis Juris tractationem illustrationemque late complexi fuimus. Cætera his similia persequi nimis longum, immo vero inutile foret (2). Nam hoc est magnæ cuidam nostrorum temporum felicitati tribuendum, ut nimirum quæ frequentissimæ superiori ævo erant Magiæ accusationes damnationesque, hac cultiori humaniorique ætate nullæ fere amplius instituantur.

(1) V. nostr. *Elem. Jur. Crim. Tom. III. edit. Rom. Cap. IX. & seq.*

(2) Erudite solideque Tartarot. *Congress. Nottur. delle Lam. lib. I. c. II. & Clariss. de Gauz. de cultib. Magicis. lib. II. vulgares Criminalium Scriptorum traditiones circa formam inquirendi agendique in Judicio adversus Magiæ accusatos, præsertim vero Lamias refutarunt. Ac certe eo usque res quondam protracta fuit, ut per Germaniam Sæculis XV. & XVI. rursus adhiberi cœperit vetus improbatumque probationis usus per aquam frigidam, ut ejus ope innotesceret, an Lamia re ipsa essent quæ de Magia dæmoniacoque commercio accusarentur. Qua ratione hujusmodi probatio fieret nos fuse exposuimus nostr. *Diatrib. de Ord. seu Form. Judicior. Criminal. Romæ 1777. typ. Salomon. De probatione per lancem & stateram, quæ etiam in usu erat ad Sagas dignoscendas, meminit Del Rio Lib. VI, 6.**

C A P U T XIV.

*De Pœnis Canonico, & Romano Jure præscriptis
adversus eos, qui de Magia accusantur.*

R Estat ut pœnas exponamus, quæ perhibentur indiçtæ adversus eos, qui Magiæ insimulati fuerunt. Ac Jure quidem Canonico eadem pœnæ, quas supra Cap. VI. retulimus in Sortilegos præscriptas, illos quoque manent, qui Magiæ student, magicasque artes exercent (1). Jure autem Romano magna severitas in hujusmodi criminis reos adhibetur. Nam usque a primis Reipublicæ temporibus, qui malum carmen canerent, vel fruges excantassent, Legibus XII. Tabularum Cereri sacri erant, idest habebantur tamquam capitis rei: postea S. C. cautum est, ut pœna Legis Corneliæ tenerentur (2). Sacra porro impia nocturnaque, ut quem obcantarent, defigerent, obligarent, facientes, faciendaque curantes I. C. Paulus scripsit aut cruci suffigi, aut bestiis obijci; ipsos Magos vivos exuri (3). Tandem Imperator Constantius edixit magicis artibus operam dantes nedum gladio ferendos, ut Imperatoriis Constitutionibus jampridem præscribebatur, sed peste ferali, idest quemadmodum Gothofredus interpretatur (4),
vi-

(1) *Cap. 1. & 2. de Sortil.*

(2) *Dig. Lib. 48. tit. Leg. 13.*

(3) *V. Sentent. 23.*

(4) *Cod. Lib. 9. tit. Leg. 6.*

vivicomburio absumendos esse (1). Neque vero defunt exempla illorum, qui de magicarum artium studio atque usu accusati vim hujusmodi Legum experti sunt. Nam Publiciam, Liciniamque una cum septuaginta aliis sociis mulieribus interemptas fuisse narrat Valerius (2), quod maleficas artes exercerent. Sic quoque jussu Consulum Publius Martius extra portam Exquilinam necatus est, Pituanus autem e saxo dejectus. Ambo enim Magiam profiteri, operamque maleficiis exercendis navare redarguebantur (3).

Quod si rerum criminalium Scriptores audiantur, ab eis traditum est extra ordinem arbitraria poena plectendos esse illos, qui dæmoniacy commercii expertes superstitiosis artibus, sigillis, cribro, ligaturis maleficia fascinationesque solvunt atque depellunt; capite vero puniendos, qui noxam fecerint, damnumque aliquod hominibus vel armentis intulerint sive carminibus sive diris imprecationibus sive pharmacis præparatis (4). At quicumque pacta cum Dæmonibus inierint, vel impudicos luserint lusus, eos docent ignis supplicio mactandos esse.

(1) Plato ex antiquiorum Gentium institutis refert *Lib. II. De Leg.* morte multatos quicumque ausi fuerint improbis sacrificiis & maleficis incantationibus vitam homini eripere. De Persis narrat Plutarchus in *Artaxerxe*, cervicem apud eos lapidibus fractam contritamque fuisse magicarum maleficarumque artium studiosis.

(2) Val. *Lib. VI. cap. 3.*

(3) Tacit. *Annal. II.*

(4) Berg. *Elem. Crim. cap. II. Struv. Dissert. Crim. VII. §. 14.*

CAPUT XV.

*Quid animadvertendum, quidve præstandum circa
crimen pœnisque Magia.*

Qui nullam præternaturalem dæmoniacamque magicis artibus vim inesse contendunt, quorum jam suo loco monuimus non exiguum esse numerum; ii Magiæ crimen eo ipso tollere e medio videntur, ac propterea non verentur asserere descriptas superiori Capite pœnas numquam iuste opportuneque infligi. Cateri vero, non qui præternaturali ac dæmoniacavi magicas artes pollere rentur, quos nihil morandum; sed qui singulari divino permissu interdum contingere posse probabilius prudentiusque censent, ut Dæmones conatus iuverint scelestorum hominum illis improbe utentium; hi quoque dubitare coguntur an & quando locus esse possit iisdem pœnis jure ac merito irrogandis. Tam enim perraro id ajunt permitti divinitus, ut semper propemodum sit metuendum, ne quis in tanta rei obscuritate ac difficultate, tantaque partim nequitia, partim inscitia perversorum hominum rudiumque muliercularum deceptus sit, vel facile decipiatur. Certe si Apostasia, Blasphemia, Hæresis, vana superstitio, impietas, sacrarum rerum contemptus ususque prophanus, si Stellionatus, Veneficium, aliaque similia facinora adsint, & Magiæ nomine traducantur; oportebit ea sedulo discernere, & pro admissio delicto legitimis pœnis in Reos animadvertere (1). Interest enim Reipublicæ, ne scelera

(1) V. De Cauz. De cult. Mag. Lib. 2. cap. 2.

Uera illorum abeant impunita, qui ausi fuerint Religionem temerare, alienamque salutem lādere. Nullo autem horum similiumque criminum extante, quod mereat pro communi exemplo puniri; alicubi prudentissime opportunissimeque inuēctum est, ut qui de Magia adhuc fortasse accusarentur ad Medicos potius remittantur diāta helleboroque curandi, quam ut præterito ævo mos erat, carnifici tradantur immaniter igne cremandi (1). Ira Vindobonæ non semel factum providissimo consilio felicique exitu narrat Illustr. Aulic. Archiat. Antonius de Haen (2). Ac nemo quidem ignorat maximam esse vim phantasiæ, qua fit, ut vel vigilantes aliquando desipiant homines, nec raro gravissime decipiantur; præsertim si morbus aliquis aut tristis eventus cerebri temperationem læserit, animumque vehementer perturbaverit (3). Sic Gennādii cujusdam, de quo loquitur D. Augustinus (4), phantasia se male habebat, ut Cœlitum choris quotidie in-

(1) Quantopere sit proficua hujusmodi cum Lamiis cæterisque, qui de Magia infimulantur agendi ratio, innuere eleganter sapideque videtur Anonymus Scriptor *du Calendrier de Philadelphie pour l'année 1777. A' Londres*: "Mistress Rachel prétend que les buchers ardents attirent les Sorciers, comme l'aimant attire le fer, ou comme le papillon vole à la chandelle. Pourquoi ne se trouve-t-il pas un seul Sorcier dans l'Amerique unie? Parceque on ne s'y est jamais avisé de les bruler."

(2) *Ration. Med. part. XV. Diff. de Mag. part. 3. cap. 3.*

(3) D. Hertod. in *Tartarot. Mastig. Morav.* refert, nobilissimi generis adolescentem tam tetra affectione hypocondriaca oppressum fuisse, ut se equitare, canibus venari, ac Sagarum instar per aera, ut vulgo narratur, volitare sibi videretur; a quo morbo artis medicæ præfidiis tandem feliciter liberatus est.

(4) *De Civ. Dei* XVIII. 18.

interesse putaret: & nemo ignorat epicæ poetices inter Italos principem Torquatum Tassum id sibi persuasisse, Spiritum nempe suos ante oculos obversari, quocum familiarissime viveret. Quemadmodum igitur *plenis temeto geminis exurgit mensa lucernis*; sic contingere solet, ut qui magna vi pollent phantasiæ, veluti foeminæ, rustici, robustior vulgus, ii frequentissime hallucinentur, sibi que facile persuadeant quæ numquam fecerant nec facere poterant, maleficia patrassent. Cujus quidem rei innumera pene exempla apud Scriptores occurrunt. De nescio quo homine Magiæ accusato meminit Alexander ab Alexandro (1) eum confessum esse, firmiterque adseverasse ad Tartara descendisse, Ditisque in Regia diu esse diversatum. Plures foeminas, quæ tamquam Sagæ in judicium accersitæ fuerant, constitit suo in lecto somno tranquille indulgisse quo tempore postea narrarunt se volitasse per aera, & convenisse ad convivandum, infernaque celebranda mysteria (2). Tantum phantasiæ vis potest ignaras imbecillesque mentes transversas agere, atque in gravissimos exitialesque errores inducere!

(1) *Genial. Dier. Lib. VI.*

(2) *P. Spin. S. Palat. Magist. Quæst. de Strig. cap. 31.*

